

de longueur plus de cent trente sept pieds: lesquelles furent faictes par Vespasian, pour le college des Pontifes, comme il appert d'une inscription, qui est engrauee sur vn marbre, qui fut aultresfois trouuè audiect lieu, avec telles paroles: IMP. VESPASIANVS AVG. PRO COLLEGIO PONTIFICVM FECIT.

*Des Thermes, c'est a sçavoir des Baings, & de ceux qui les ont faict bastir.*

**L**'Es Thermes estoient des lieux fort amples, somptueux, & spacieux, esquelz on se baignoit, & lauoit. Le pavè en estoit de marbre, les porches tresgrands, les murailles blanchies, ou faictes de beaux marbres, avec de tresgrandes colonnes, qui soustenoient des arcades de grandeur desmesuree. Les principales de plusieurs qu'il y en auoit, estoient les Alexandrines, & Neronianes, basties par Alexander Seuerus, & par Neron, derriere l'Eglise de S. Eustache, ou l'on voit encore tant de ruines.

Les Agrippines faictes par Agrippa, estoient entre la Ronda, & la Minerua, au lieu, qui s'appelle la Ciambella, ou l'on en voit encore des vestiges.

Les Antonianes commenees par Antonius Caracalla, & finies par Alexandre estoient au mont Auentinus, & sont encor en pied a demy desmolies, ornees de tresbeaux marbres, de tresgrandes colonnes, & d'une esmerueillable grandeur.

Les Aurelianes faictes par l'Empereur Valerius Aurelianus, estoient delà le Tybre, dont on voit encore des vestiges.

Les Constantines estoient sur le mont Cauallo, ou l'on en voit les ruines, dans la vigne de la tresillustre famille d'Iurea.

Les Diocletianes edifiees par Diocletianus, sont encor en pied pour la plus grande part, auprès de l'Eglise de S. Susanne, d'une esmerueillable grandeur, au bastiment desquelles Diocletian tint l'espace de plusieurs annees, cent quarante mille Chrestiens.

Les Domitianes, edifiees par Domitianus, estoient ou est a present le monastere de S. Syluestre, ou l'on en voit encore des mafures.

Les Gordianes estoient ornees de deuxcentz belles colonnes aupres de l'Eglise de S. Eusebe.